

სსიპ – ივანე ჯავახიშვილის სახელობის თბილისის სახელმწიფო უნივერსიტეტის აკადემიური პერსონალის (პროფესორი, ასოცირებული პროფესორი, ასისტენტ-პროფესორი, ასისტენტი) აფილირების წესი და პირობები

მუხლი 1. აფილირების წესისა და პირობების მიზანი

1. სსიპ – ივანე ჯავახიშვილის სახელობის თბილისის სახელმწიფო უნივერსიტეტის (შემდგომში - „უნივერსიტეტი“ ან „თსუ“) აკადემიური პერსონალის (პროფესორი, ასოცირებული პროფესორი, ასისტენტ-პროფესორი, ასისტენტი) აფილირების წესისა და პირობების (შემდგომში - „წესი“), ასევე ამ წესის მიღების სახით უნივერსიტეტის მიზანია:

ა) უნივერსიტეტის შიდასამართლებრივი აქტებისა და ამ აქტებით რეგულირებული სამართლებრივი ურთიერთობების საკანონმდებლო მოთხოვნებთან შესაბამისობის უზრუნველყოფა;

ბ) უნივერსიტეტსა და უნივერსიტეტის აკადემიურ პერსონალს შორის ისეთი ურთიერთსასარგებლო შრომითსამართლებრივი ურთიერთობების ჩამოყალიბება, რომელიც ერთის მხრივ აკადემიურ პერსონალს მისცემს საშუალებას თავისი საგანმანათლებლო და სამეცნიერო საქმიანობა (ასევე შრომითი ხელშეკრულებითა და უნივერსიტეტის სხვა სამართლებრივი აქტებით განსაზღვრული სხვა სახის საქმიანობა, რომელიც გამომდინარეობს საგანმანათლებლო და სამეცნიერო ფუნქციის შესრულებიდან) აწარმოოს უნივერსიტეტის სახელით და მეორეს მხრივ უნივერსიტეტს მისცემს საშუალებას მაქსიმალურად და შესაძლებლობის ფარგლებში შეუზღუდავად შეუწყოს ხელი აკადემიურ პერსონალს თავისი შესაძლებლობების უნივერსიტეტში სრული რეალიზებისათვის.

მუხლი 2. აფილირება

1. უნივერსიტეტთან აკადემიური პერსონალის აფილირება გულისხმობს უნივერსიტეტსა და უნივერსიტეტის აკადემიური თანამდებობის მქონე პირს (პროფესორი, ასოცირებული პროფესორი, ასისტენტ-პროფესორი, ასისტენტი) შორის წერილობითი შეთანხმების გაფორმებას, რომლის თანახმადაც აკადემიური თანამდებობის პირი ადასტურებს თავის აფილირებას მხოლოდ სსიპ - ივანე ჯავახიშვილის სახელობის თბილისის სახელმწიფო უნივერსიტეტთან, უნივერსიტეტის სახელით მონაწილეობს საზოგადოების განვითარებისა და ცოდნის გაზიარების პროცესებში და უნივერსიტეტში:

ა) ახორციელებს ძირითად საგანმანათლებლო, კვლევით/სამეცნიერო/შემოქმედებით/საშემსრულებლო საქმიანობას და მისი კვლევითი/სამეცნიერო/შემოქმედებითი/საშემსრულებლო საქმიანობის შედეგები ეთვლება მხოლოდ თსუ-ს. როგორც უნივერსიტეტში, ასევე თსუ-სა და სხვა დაწესებულების კონსოლიდირებულ რესურსებზე დაფუძნებული კვლევით/სამეცნიერო/შემოქმედებით/საშემსრულებლო საქმიანობის შედეგების ჩათვლა/განაწილებისას, თსუ-ის აფილირებული პერსონალი ვალდებულია ზემოაღნიშნული გზით მიღებული პროდუქტის ავტორად/თანაავტორად ფიგურირებდეს მხოლოდ როგორც თსუ-ის აფილირებული პერსონალი შესაბამისი წერილობითი მითითებით -

„სსიპ ივანე ჯავახიშვილის სახელობის თბილისის სახელმწიფო უნივერსიტეტი/ LEPL - Ivane Javakhishvili Tbilisi State University“, იმ სახით რა სახითა და ფორმითაც აღნიშნული შესაძლებელია კონკრეტული პროდუქტის შემთხვევაში (მაგ.: სამეცნიერო პუბლიკაციის გამოქვეყნების დროს თსუ-ის პერსონალი ავტორად მითითებისას აფილირებაში აუცილებლად უთითებს მხოლოდ „სსიპ - ივანე ჯავახიშვილის სახელობის თბილისის სახელმწიფო უნივერსიტეტი/ LEPL - Ivane Javakhishvili Tbilisi State University“ და სხვ.);

ბ) აქტიურად არის ჩართული თსუ-ში საგანმანათლებლო, კვლევით/სამეცნიერო/ შემოქმედებით/საშემსრულებლო და სხვა მნიშვნელოვან საკითხებთან დაკავშირებით გადაწყვეტილების მიღების პროცესებში;

გ) აქტიურად არის ჩართული სტუდენტებისათვის კონსულტაციების გაწევისა და კვლევითი/სამეცნიერო/შემოქმედებითი/საშემსრულებლო საქმიანობის ხელმძღვანელობის პროცესებში.

მუხლი 3. აფილირებული აკადემიური პერსონალი

1. უნივერსიტეტს ჰყავს მხოლოდ აფილირებული აკადემიური პერსონალი, რომელიც შესაბამის აკადემიურ თანამდებობაზე კანონმდებლობით დადგენილი წესით გამოცხადებულ კონკურსში მონაწილეობით ადასტურებს მზაობას გახდეს უნივერსიტეტის აფილირებული აკადემიური პერსონალი მისი აღნიშნულ კონკურსში გამარჯვებისა და აკადემიურ თანამდებობაზე არჩევის შემთხვევაში, ხოლო ხსენებულ თანამდებობაზე არჩევისთანავე, შრომითსამართლებრივი ურთიერთობების გაფორმებისას, წინამდებარე წესით დადგენილი პირობების თანახმად, უნივერსიტეტთან წერილობით გააფორმებს აფილირების შეთანხმებას (დანართი №2). აღნიშნული მიზნით უნივერსიტეტი უზრუნველყოფს აკადემიური თანამდებობის დასაკავებლად გამოცხადებული ყოველი ცალკეული კონკურსის პირობებში ამ პუნქტით განსაზღვრული, ზემოხსენებული პირობების მითითებას.

2. აფილირებული აკადემიური პერსონალი ვალდებულია, გარდა მასთან გაფორმებული შრომითსამართლებრივი ურთიერთობების მარეგულირებელი აქტებისა (შრომითი ხელშეკრულება, შეთანხმება და სხვ.) და უნივერსიტეტში მოქმედი შრომითსამართლებრივი აქტებით მისთვის განსაზღვრული შრომის პირობებისა, დაიცვას წინამდებარე წესის მოთხოვნები, რომელიც მისი შრომითი ხელშეკრულების შემადგენელი (განუყოფელი) ნაწილია.

3. პირი, რომელსაც სურს დაიკავოს უნივერსიტეტის აკადემიური თანამდებობა ვალდებულია გაეცნოს წინამდებარე წესის მოთხოვნებს და აკადემიური თანამდებობის დასაკავებლად გამოცხადებულ კონკურსში მონაწილეობის მიღების მიზნით (უნივერსიტეტის სხვა შესაბამის პირობებთან ერთად) წერილობით გამოხატოს თანხმობა მხოლოდ ივანე ჯავახიშვილის სახელობის თბილისის სახელმწიფო უნივერსიტეტთან აფილირების შესახებ, რაც ძალაში შედის მის მიერ შესაბამისი აკადემიური თანამდებობის დაკავებისთანავე და წერილობით დაადასტუროს ინფორმაცია იმის შესახებ, რომ არ გააჩნია ძალაში მყოფი ანალოგიური ხასიათის დოკუმენტი (ხელშეკრულება, შეთანხმება ან სხვ.) სხვა უმაღლეს საგანმანათლებლო დაწესებულებასთან.

4. ამ მუხლის მე-3 პუნქტის მოთხოვნებიდან გამომდინარე, უნივერსიტეტი ვალდებულია ხელმისაწვდომი გახადოს წინამდებარე წესი საჯარო გაცნობისათვის და აკადემიური თანამდებობის დაკავების მსურველს გააცნოს მისი შინაარსი, ასევე უნივერსიტეტი იტოვებს უფლებას კანონმდებლობით დადგენილი წესით გადაამოწმოს ამ მუხლის მე-3 პუნქტით გათვალისწინებული პირის მიერ წარმოდგენილი ინფორმაცია.

5. აფილირებული აკადემიური პერსონალი გამონაკლის შემთხვევაში უფლებამოსილია, უნივერსიტეტის შესაბამისი ფაკულტეტის დეკანისა და უნივერსიტეტის ადმინისტრაციის ხელმძღვანელისათვის წერილობითი ცნობებით (რომელშიც მითითებული უნდა იყოს შესაბამისი უმაღლესი საგანმანათლებლო დაწესებულების დასახელება, ჩასატარებელი საათების რაოდენობა, საქმიანობის პერიოდი), განახორციელოს საგანმანათლებლო-სალექციო (მხოლოდ სალექციო, სასემინარო, პრაქტიკული, ლაბორატორიული) საქმიანობა სხვა უმაღლეს საგანმანათლებლო დაწესებულებაში. იურიდიული, ეკონომიკისა და ბიზნესის, სოციალურ და პოლიტიკურ მეცნიერებათა, ფსიქოლოგიის და განათლების მეცნიერებათა ფაკულტეტების „ა“ კატეგორიის პროფესორის, ასოცირებული პროფესორის, ასისტენტ-პროფესორისა და ზუსტ და საბუნებისმეტყველო მეცნიერებათა და ჰუმანიტარულ მეცნიერებათა ფაკულტეტების „ა“ და „ბ“ კატეგორიის პროფესორის, ასოცირებული პროფესორის, ასისტენტ-პროფესორისათვის ამ პუნქტით დადგენილი უფლებამოსილების პირობები განისაზღვრება „სსიპ – ივანე ჯავახიშვილის სახელობის თბილისის სახელმწიფო უნივერსიტეტის აკადემიური პერსონალის (პროფესორი, ასოცირებული პროფესორი, ასისტენტ-პროფესორი) შრომის ანაზღაურების (თანამდებობრივი სარგო და დანამატი) ოდენობისა და პირობების დადგენის შესახებ“ აკადემიური საბჭოს დადგენილებით.